

Prof.dr Abdulah Muminagić

Nakon kraće bolesti 15.07.2001. godine preminuo je u Sarajevu naš dragi i uvaženi kolega prof.dr Abdulah Muminagić. Uz prisustvo članova obitelji i velikog broja prijatelja, kolega, studenata i drugih poštovalaca ispraćen je i sahranjen 17.07.2001. na gradskom groblju "Bare" u Sarajevu.

Profesor Muminagić rođen je u Ljubuškom 1919. godine. Geodetski odsjek Srednje tehničke škole završio je u Beogradu 1938. godine, nakon čega se, po odsluženju vojnog roka, zapošljava u Odjeljenju katastra i državnih dobara. Do početka Drugog svjetskog rata radi na snimanju više katastarskih općina u Srbiji, a od početka rata u Zvorniku na održavanju katastra i triangulacije. U augustu 1943. godine stupa u redove Narodnooslobodilačke vojske Jugoslavije. Ostaje u Armiji i zapošljava se u Vojnogeografskom institutu (VGI) bivše Jugoslavije. Odatle je 1946. godine upućen na školovanje na Geodetski fakultet Vojnoinženjerske akademije u Moskvi, gdje sa odličnim uspjehom završava prve dvije godine studija. Poslije Rezolucije Informbiroa vraća se u zemlju i nastavlja studij na Geodetskom odjelu Tehničkog fakulteta u Zagrebu gdje 1952. godine i diplomira sa odličnim uspjehom.

Odmah nakon diplomiranja kao aktivni oficir u VGI radi na različitim naučnim i stručnim poslovima vezanim za Višu geodeziju. Izabran je i za profesora Više vojne akademije za predmete Račun izravnjanja (1956.g.) i Viša geodezija (1958.g.).

Godine 1964. postavljen je za načelnika Geodetskog odjeljenja VGI, gdje kao pukovnik rukovodi opsežnim radovima iz područja Više geodezije, koji se tada vrše na cijeloj teritoriji bivše Jugoslavije (triangulacija, precizni nivelman, gravimetrija).

Na Geodetskom fakultetu u Zagrebu odbranio je 1971.g. doktorsku disertaciju pod naslovom "Ispitivanje realnog geoida u Jugoslaviji".

Od 1971. do 1974. godine bio je direktor zavoda za kartografiju "Geokarta" u Beogradu, a 1974. godine izabran je za savjetnika Izvršnog vijeća SR Bosne i Hercegovine. Iste godine izabran je u zvanje vanrednog profesora za predmet Račun izravnjanja, a 1976. godine u zvanje redovnog profesora na predmetima Viša geodezija I i Viša geodezija II na Građevinskom fakultetu Univerziteta u Sarajevu.

Profesor Muminagić je 1985. godine otišao u zasluženu mirovinu, ali nije prekidao vezu sa Građevinskim fakultetom. Uoči agresije na našu zemlju, 1992. godine, nastavnik koji je predavao Višu geodeziju napustio je Fakultet, a profesor Muminagić se spremno

odazvao molbi da kao umirovljeni profesor predaje te predmete. Predavao je i u teškom ratnom i poratnom vremenu sve do svoje smrti.

Profesor Muminagić je napisao tri univerzitetska udžbenika i to Račun izravnjanja (1965.g.), Viša geodezija I (1981.g.) i Viša geodezija II (1985. g.), koje je stručna kritika visoko ocijenila. Za udžbenik Viša geodezija I dobio je prestižnu nagradu "Veselin Masleša".

U svojoj 60-godišnjoj aktivnosti na polju Geodezije napisao je veliki broj naučnih i stručnih radova, koje je objavljivao u stručnim časopisima. Sudjelovao je na brojnim savjetovanjima i simpozijima u bivšoj Jugoslaviji i inozemstvu, na kojima je podnio veliki broj referata.

Treba naročito spomenuti njegov rad na prvom geoidu Jugoslavije, što je našlo mjesta u Enciklopediji Jugoslavenskog leksikografskog zavoda, te vođenju komisije za izradu Višejezičnog geodetskog rječnika (na osam jezika) u izdanju Saveza geodetskih inženjera i geometara Jugoslavije.

Poseban kvalitet profesora Muminagića bilo je poznavanje stranih jezika. Govorio je engleski i ruski, a dobro se služio francuskim i njemačkim jezikom. Čitao je stručnu literaturu na svim slavenskim jezicima.

Pored većeg broja naučnih i stručnih članaka za potrebe VGI bivše Jugoslavije preveo je udžbenike P.N. Krasovskog "Kurs vyšej geodezii" II dio sa ruskog i J. Vignala "Nivellement de precision" sa francuskog jezika.

Uz već spomenutu nagradu "Veselin Masleša" nosilac je šest mirnodopskih i ratnih odlikovanja. Dobio je Povelju Građevinskog fakulteta u Sarajevu "u znak posebnog priznanja za izuzetne zasluge u radu i razvoju Fakulteta".

Bio je veoma aktivan u radu stručnih udruženja. Nemoguće je navesti sve njegove aktivnosti u radu tih udruženja, pa ćemo pokušati navesti barem najvažnije:

- izabran je za sekretara Nacionalnog komiteta za Međunarodnu geofizičku godinu (1957.g.),
- bio je sekretar delegacije bivše Jugoslavije na Kongresu CSAGI - Naučnog komiteta za međunarodnu fizičku godinu u Moskvi (1958.g.),
- izabran za člana Komisije za geodeziju u Akademijском savjetu bivše Jugoslavije (1959.g.),
- izabran za eksperta za ocjenu naučnih projekata u Saveznom fondu za naučni rad (1962.-1965.g.),
- kao stipendista UNESCO-a boravio je mjesec i po dana na Geodetskom institutu u Helsinkiju, a po 10 dana u institutima u Stokholmu, Oslu i Kopenhagenu,
- rukovodio je jugoslavenskom delegacijom Međunarodne federacije geometara u Visbadenu (1971.g.),
- rukovodio je jugoslavenskom delegacijom na Kongresu Međunarodne geodetske i geofizičke unije u Moskvi (1971.g.),
- Tehnička komora Grčke pozvala ga je da učestvuje na simpozijumima o satelitskoj geodeziji i korišćenju lasera za rješavanje geodetskih zadataka pomoću satelita (1972.g.),
- rukovodio je jugoslavenskom delegacijom na Kongresu Međunarodne federacije geometara u Londonu (1974.g.),
- rukovodio jugoslavenskom delegacijom na kongresu Međunarodne geodetske i geofizičke unije u Grenoblu (1975.g.),

- rukovodio jugoslavenskom delegacijom na kongresu Međunarodne geodetske i geofizičke unije u Canberi (1980.g.),
- bio je član Organizacionog i Redakcionog odbora za III, IV i V kongres Geodetskih inženjera i geometara Jugoslavije,
- inicijator je i organizator uključenja bivše Jugoslavije u Međunarodnu asocijaciju za kartografiju,
- inicijator je i organizator osnivanja i dugogodišnji predsjednik Nacionalnog komiteta bivše Jugoslavije za geodeziju i geofiziku,
- na XV Kongresu Međunarodne geodetske i geofizičke unije (MGGU) izabran je za člana Komisije 5.2 – za ispitivanje geoida – Međunarodne asocijacije za geodeziju (MAG),
- od osnivanja Komisije 1.21. Međunarodne asocijacije za geodeziju – za izravnjanje velikih geodetskih mreža – do njenog rasformiranja nakon izvršenja zadatka bio je član te Komisije. Za uspješan rad dobio je zahvalnicu Biroa Međunarodne asocijacije za geodeziju,
- na njegovu inicijativu na XV Kongresu Međunarodne geodetske i geofizičke unije, osnovana je Komisija za ispitivanje geoida u Evropi i Mediteranskom području, čiji je bio dugogodišnji član,
- u dva mandata izabran je za člana stalnog Komiteta Međunarodne federacije geometara,
- bio je član državne Komisije za osnovne geodetske radove bivše Jugoslavije.

Profesor Muminagić bio je

- predsjednik Saveza geodetskih inženjera i geometara bivše Jugoslavije od 1967.-1972. godine,
- zaslužni i počasni član Saveza inženjera i tehničara bivše Jugoslavije i Bosne i Hercegovine,
- zaslužni i počasni član Saveza geodetskih inženjera i geometara Jugoslavije i Bosne i Hercegovine,
- počasni član Naučno-tehničkog društva geodeta i kartografa Mađarske,
- počasni član Naučno-tehničkog društva (NOT) poljskih geodeta,
- nosilac spomen plakete Saveza geodetskih inženjera i geometara bivše Jugoslavije za dugogodišnji rad,
- nosilac spomen plakete Instituta za geografiju Akademije nauka Sovjetskog saveza povodom 50. godišnjice njegovog rada,
- nosilac spomenplakete Centralnog instituta za fiziku Zemlje u Potsdamu povodom 100. godišnjice rada,
- nosilac značke i povelje “Odličnik geodezije i kartografije” koja je – kao najviše priznanje za naučni rad u geodeziji – dodjeljivala Glavna uprava za geodeziju i kartografiju Sovjetskog saveza (1971.g.).

Posebno ističemo njegov doprinos stručnom časopisu “Geodetski glasnik” koji izdaje Savez udruženja građana geodetske struke Bosne i Hercegovine. Bio je predsjednik Redakcionog odbora sve do svoje smrti, a napisao je i recenzirao veliki broj članaka objavljenih u tom časopisu.

Imao je vrlo skladan obiteljski život. Od mladosti pa sve do svoje smrti dobro i zlo dijelio je sa svojom vjernom i odanom suprugom. Ima mnogo i njene zasluge za tako uspješan život profesora Muminagića.

Kćerku je volio očinskom ljubavlju. Roditelji su joj omogućili da stekne najviše obrazovanje i ugled u društvu. Naročito je volio i posvećivao pažnju svojoj unuci i unuku.

Profesor Muminagić je rado prenosio svoje znanje ne samo studentima nego i asistentima i drugim kolegama. Kolege će svojim znanjem i trudom pokušati nadoknaditi prazninu nastalu njegovim odlaskom, ali unatoč tomu gubitak našeg dragog profesora i kolege bolan je i nenadoknativ.

Uvijek je bio ljubazan i spreman da pomogne, pa će u našim sjećanjima i srcima ostati kao izuzetan čovjek, profesor i kolega.

Neka mu je slava i hvala za sve što je učinio !

Nihad Kapetanović